

Cairns:

Cairns isch mis erste Plaetzli gsii in Australie, ha aber nach Asie fascht en Kulturshock gha. Es isch alles so normal und zivilisiert und mega touristisch! Nach 3,5 Monet Asie isch mir das scho total schief ine cho und di erste 3 Taeg waer ich am gad wieder zrugg!

Cairns selber isch nuet speziells, s'haet en Salzwasserpool, will mer nid im Meer chan go bade und einigi Shoppingcenter, Laedeli-Strasse.

I bi daenn ufen 1 Tages Segeltrip is Great Barrier Reef go schnorchle. Ha leider nid choene Tauche, da i immerno vercheltet gsii bin!:o (Bin aber echt chli entosche gsii, s'haet mega wenig Fisch gha und has mir ehrlich gseit au farbiger vorgstellt. Aber immerhin han i no 4 Riffhaie gseh und zwar ziemlich naech bi mir!:o)

Nach 3 tag isch denn d'Corina (ha sie im Surfcamp kenneglernt), mitem Auto aachoo! Nach 1 relax Tag, da sie vo Brisbane nach Cairns i 3 Tag allei ufegfahre isch, haend mir ues uf dae Weg durab gmacht! Euses Ziel isch Airlie Beach gsii, damit mir det go Segle choend! I bin also nach 3,5 Moent endli wieder mal Auto gfahre, halt eifach uf dae Linke Siite und das isch total komisch gsii! Mit Zelt uebernachtig in Ayr, sind mir nach Airlie duesed!:o)

Airlie Beach - Segeltrip Whitsunday Islands:

Nachere Nacht im BP, was nach Zelte uf haertem Bode und schwitze, wunderschoen gsii isch, sind mir am morge no chli in Airlie gsii. Isch total Touristisch, jensti BP, Restaurants und Bar's!

Am Namittag sind mir zum Hafe, damit mir uf euse Segeltrip choend! Nachdem mir "Stingersuits"(schutz vor Qualle, mega giga Sexy:o)) gfasst haend, sind mir mit mae Boetli zum Segelschiff "Spank Me" tuckerlet worde! 28. Persone, ha mi zerscht scho chli gfraeget ob mir all Platz haend, aber das sisch denn Super gange! Corina und i haend s'Bett teilt, i dae obere Etage, ha also am morge natuerlich da Grind nid nur eimal aagschlage!:o) Isch scho recht speziell so i mae Schiffsbuuch z'schlafe! A daem Tag isch Corina au no 20'gi worde und i ha ihre nachem Znachtess es Stuck Chueche braach und all haend gsunge!:o) (die einte scho echli schief, wegem Wii oder i hoffs uf jedefall fuer die) I glaub d'Ueberraschig isch glunge!

Am naechste Tag sind mir uf d'Insle zum Whiteheavenbeach boetlet worde! Leider haet d'Sunne nid gschunne und s'blau Wasser und Sandbaenk nid so zur gaeltig cho! Aber baedele, i super klarem Wasser, han i trotzdem mega gnosse!:o) Am Nami und au am naechste Tag isch Tauche und Schnorchle ufem Programm gstande. Leider bin i immerno so verkeltet gsii und i ha wieder nume choene go Schnorchle gah. Au dasmal isches irgendwie nid so gsii, wie i gemeint han. Es haet zwar Fisch gha, aber eifach nid wuerklich viel. Guet wenn mer bedenkt dases so viel Luet haet, verstahn i die Fisch total!:o)

Mir haend 2 Schwiizerinne, d'Sonja und d'Steffi kenneglernt, isch mega laessig gsii. Nach 4 tag und 3 Naecht haend mir all, denn aber s'Schiff langsam gseh und sind froh gsii, wieder a Land z'sii! Am Abig sind mir 4 Maedels no zaeme go aesse und eis go trinke! Leider sind die beide richtig Norde ue, aber mir haend scho fuer en Brunch i dae Schwiiz abgmacht!:o)

Town of 1770:

Also in Town of 1770 aacho und dae Campingplatz bezoge, haend mir gad gmerkt, dass das nid ues meh als em Campingplatz, ere Pizzeria und vielne Feriehueser besteht. Dae Camping liit daefuer direkt am Meer, was wunderschoen isch!:o) Mir haend ues det mit viel improvisation, es feins Znachtess kochet und sind scho glii is Bett!

Am naechste tag sind mir nachdem mir am Beach vor Hitz fascht verloffte sind, is naechst groessere Staedtli - Agnes Water. Det haets en Supermarkt, suscht no es paar Laedeli und mir

haend 1 Strichli Natel empfang gha!:o) Suscht haet mir das Oertli aber super guet gfalle, mega schoens Meer, kei Touriste und eifach uh friedlich!
Also danke vielmal Meli, ohni din Tip waehred mir sicher nid dete glandet!:o)
Am naechste Tag sind mir no chli go baedele und wiiter nach Hervey Bay!

Hervey Bay - Fraser Island:

Nach ere mega bequeme Nacht im BP:o), haend mir am 6:00 muese uufstah und as Briefing fuer Fraser Island. Nachdem mir i Gruppe unterteilt worde sind, haend mir Food und Alkohol posti Liste gmacht und denn isch's au scho richtig Auto Vermietig gange. Eusi Gruppe: Claudio, Marco (Schwiiz), Erika (USA), Lore, Matilde, Marie (Frankreich), Ronan (Israel), Corina und i!

Nach viel Infos ueber d'Insle und s'Auto, Campingmaterial und Esse packt, sind mir richtig Autofahre! Det isch euse Fahrer dae Claudio scho s'erst mal gforderet gsii, aber mit mir als Biifahrerin, Navigatorin, Ziiitplanerin und helferin, haend mir das loecke gschafft!:o)

Am 1. Tag sind mir z'erst quer durd Insle gfahre und dae Beach duruff zum Lake Wabby. S'Auto haend mir am Strand stah lah und sind 30 min. duur dae Wald zum See gloffe. Uf daem Weg sind mini Nerve gad chli gforderet gsii, will am Wegrand haet's z.T. riise Spinne gha. Haet mi ueberall aagfange biise!:o) Aber s'haet sich echt glohnt, isch uh schoen gsii und e mega abchuelig! Am 16:30 sind mir denn bim Base Camp aachoo und haend Zelt uufgestellt und z'Nacht koched! nachher isch's grosse Wii trinke loosgange und i ha ziemli eine Sitze gha!:o)

Am 2. Tag sind mir frueh uufgstande und in Norde ufegfahre! Det 1 Stund a dae pralle Sunne en Strand uufgloffe! Als belohnig haned mir denn choene go baedele, aber ufem Rueckweg isches denn wieder so heiss gsii, dass mer gad wieder gschwitzt haet. I bin det umegloffe wie en Beduin(kei ahnig wie mer das gnau schriibt) uf jedefall han i mis Tuechli um mich umegwicklet, suscht hett i mi glaub verbrennt! Am Nami sind mir wieder abe richtig Camp und no i mae wunderschoen Fluss (Eli Creek) go bade.

Nachere Nacht, wo all chli Trinkspieli gmacht haend, haend mir am morge (oder bessergseit eusi Manne) muese s'Rad wechsle, damir en Platte gha haend!:o(Denn ischs ufere mega holperige Strass (also wuerklich Strasse haets da ja ueberhaupt nid, isch alles eifach Sand. Haend also viel gseh, wo irgendwo im Sand stecke blibe sind. Was eus zum Glueck nid passiert isch), zum Lake Mackenzie gange und das isch definitiv dae Hoehepunkt gsii! Alles mit Sand und wunderschoen Farbe im Wasser, sind also gad dae ganz Tag blibe! Am 4i isch denn wieder zrug zu dae Faehre gange und i ha s'erst mal i daene 3 taeg nid gnau choene saege ob mir ufem richtige Waeg sind. Aber dae Claudio und i sind es guets Team gsii und so haend mir dae Weg denn doch gfunde!

Sind 3 super taeg gsii und mir haend e mega laessigi Gruppe gha! Mue au no saege, dass i echt froh gsii bin, dass dae Claudio gfahre isch und er haet das echt super gmacht! Huet ab!

Noosa:

Also bi Noosa han i echt chli pech gha. I ha mi so sehr uf das gfreut, aber leider haet's mi is Bett glitzt. Mir haend zum guete Glueck entschiede i es BP und nid ufen Campingplatz zgah. I ha aber trotz viel umelige und schlafe, dae Strand und d'Shoppingmeile vo Noosa Heads gseh. mer hett au no choene in Nationalpark vo Noos go laufe gah, det isch Corina mit 2 eusem Zimmer hii und i han s'Bett gwaermt:o(Am Strand haend mir die beide Schwiizer vo dae Fraser no troffe!

Noosa isch aber wuerklich uh schoen und i haets gern chli meh gnosse!

D'Englaenderinne haend sogar z'gfuehl gha i maeg sie nid, will i immer gschlafe
han.....typisch Frau! Oder Manne? :o) Drumm han i viel, viel lieber gmischti Zimmer, det isch
nid so e zickerei!